

道園學古錄

冊二

道園學古錄卷之四

在朝藁四
雍虞集伯生

芝亭永言

絕句七言

次韻竹枝歌答袁伯長

沙禽東去避網羅
蕩舟相逐如遠何
越山青青越女白
從此勞人魂夢多

春江風濤苦欲歸
東盡滄溟南斗低
明年白日百花靜
憶爾琴中鳥夜啼

燕姬當壚玉雪清
簫中吹得鳳凰聲
不及晴江轉桡鼓
洗盞船頭沙鳥鳴

木夫容

九月襄王宴渚宮
霓旌翠羽度雲中
滿汀山雨衣裳濕
宋玉愁多賦未工

水夫容

長洲宮沼醉西施
蕩漾蘭舟不自持
願奉君王千歲樂
一盤清露玉淋漓

送四川憲使

晚趨嚴召直承明侃侃論思歲未更國老不應持節去鄉人徒羨過家榮

錦溪園裏千尋竹夏日移床就綠陰烏帽練衣邛竹杖閒來誰與共清吟

已歎玄經返墨池復愁國史奉嚴祠離鄉遊子歸仍晚獨對東風惜鬢絲

小東郭外今無舍萬里橋西況有田不恨錦官非昔日但尋玉局是何年

龍游峽口芝千本仙井山中玉數匳老去首丘天所念未甘孫子祇東南

曹將軍馬

高秋風起玉關西踣鐵歸朝百萬蹄貌得當時第一匹昭陵風雨夜聞嘶

舊屋

舊屋已屬他人家臨風且復立江沙欲從子雲訪墨沼更向少陵尋浣花

誰家

誰家結屋倚江湍五月湍聲入座寒種樹已堪維馬騎開軒即可把
漁竿

馬圖

昔在乾淳撫蜀師賣茶買馬濟時危鄉人啜茗同觀畫解說前朝復
有誰

先君太史棄諸孤之四年集來吳門省連州府君大墓始
見叔父南山翁翁與集同出太師雍國公蓋四從矣翁曰
後會未可期幸留數語識歲月翁方客授外鄉又以推人
生年月日論禍福以代耕故不能久留城中敢用賦此以
承命云耳

玉屏古柏與天齊使過于今又七期各道遺書向江上西風江水鬢
絲絲

玉遮墓下有諸孫東望滄波每斷魂泣血三年餘喘在更將衰淚灑
荒園

族人散處江南郡不識音容但記名世澤須令孫子憶故家今幾尙
簪纓

王母圖

瑤草春深晝日閒
靈芝清露自怡顏
雙成吹徹參差玉
八駿人間去不還

偷桃小兒癡且妍
恃恩無賴更蒙憐
竊翻雷電天公怒
風雨落花紅九川

黃竹遺墟白雪高空
桑戴勝向晨鳴
茂陵多欲非仙器
枉賜金盤五色桃

西望瑤池斗柄旋
金明水淨月娟娟
請觀阿母神仙籍
名在龜山第幾篇

竹杏沙頭鸚鵡

蛺蝶飛來石竹藂
羅襦曾試繡紋重
荷花啼鳥銀屏暖
臥看牕間唾碧茸

閩州海棠

閩州城南天下稀
海棠參天鸚鵡飛
百年高興付蕭散
老著西江何日歸

畫猿

冷泉亭下呼常到
巫峽舟中聽更愁
老石枯藤還見汝
因懷經處思

悠悠

記夢中詩三首

祝融君紫虛君率子廉

出海雲霞九色芒金容滉瀟水中央向曾賜服玄洲玉今結蕭臺五鳳章

飛步崔嵬上九宮親題彩筆篆明虹玉樓臨海連天碧待子扶桑鶴出籠

失卻漁磯返棹遲幾回石上候安期老翁若下諸年少總解題詩笑鬢絲

題周東陽進士爲南郭園林記後

南郭名園纔隔縣好添花竹及清時歸來未老柴車在百里尋春定可期

維摩

二士同開不二門是何境界擬評論若爲普供諸香飯貴得薰聞識道根

錢舜舉折枝夫容

白髮多情憶劒南秋風溪上看春酣翦來一尺吳江水擬比千花濯

錦潭

商德符小景

商公昔者觀秦蜀劍閣崢嶸筆底開又向江南住三載不爲廬阜卽天台

天曆改元十月題子昂馬

朝廷無事日從容太僕承恩出九重前代王孫今閣老只畫天閑八尺龍

寄馬伯庸尙書

江上河豚吹柳花三月淮船當到家賜金盡賣買田舍坐對八公吟日斜

商德符小景

五老峯前屢往來紫雲如蓋蔭崔嵬十年京國頻看畫最愛高僧坐石苔

賦故宋李忠襄公植烏石渡舊隱

窈窕幽篁帶薜蘿青春白日坐蹉跎試詢烏石江頭水寧有微波接汨羅

訪杜弘道長史不值道中偶成

雨泥輕塵道半乾興來隨處借花看牆東千樹垂楊柳飛絮時時近馬鞍

聽雨

屏風圍坐鬢毵毵絳蠟搖光照暮酣京國多年情態改忽聽春雨憶江南

春雲

春雲漠漠度宮城樓雪初融水未生行過御溝成久立起頭枝上有流鶯

與趙子期趨閣

日出風生太液波畫橋千尺彩船過橋頭柳色深如許應是偏承雨露多

玉堂讀卷雜賦次韻

待漏宮門聽鑰開袖中進卷總賢才奏名殿裏千花合傳勅階前好雨來

千花覆檻柳垂絲畫刻傳呼淑景遲聖主自觀新進策侍臣簪筆立多時

文章光焰貫長虹來者無窮去者空頭白眼昏心力盡高堂深夜燭

搖紅

題陳衆仲助教送人之官南平序後

我憶錦溪最上原春雲爲雨日行天何時獨上溪邊閣不待冷風已
洒然

院中獨坐

何處他年寄此生山中江上總關情無端繞屋長松樹盡把風聲作
雨聲

題歐陽原功少監家柯敬仲畫

泚陽日日水生波翠袖黃裳晚櫂過珠樹月明花婀娜鳳毛春煖錦
婆婆

楚宮朝雨過江潭燕燕新來試浴蠶庭下錦衣皆稚子牕前秀色是
宜男

子昂人馬圖

綠衣奴子十七八面如紅玉牽馬過繡簾美人時共看堦前青草落
花多

紹興間臨安士人有賦曲一春長費買花錢日日醉湖邊
玉驄慣識西湖路驕嘶過沽酒樓前紅杏香中簫鼓綠楊

影裏鞦韆晚風十里麗人天花壓鬢雲偏畫船載得春歸
去餘情付湖水湖烟明日重攜殘酒來尋陌上花鈿思陵
見而喜之恨其後疊第五句重攜殘酒酸寒改曰重扶殘
醉因歐陽原功言及此與陳衆仲尋腔度之歌之一再董
此字求書其事因書之并系以此詩

重扶殘醉西湖上不見春風見畫船頭白故人無在者斷堤楊柳舞
青煙

題畫古木

高秋木落洞庭空岳陽城南多晚風蛟龍夜護玉壇古劍影長留明
月中

八月十五日得 旨先歸驛騎在門復召還草 詔十七
日至桓州驛題壁

烏桓東望天無際祇有銀蟾出海頭不得吹簫送清夜禁城鐘鼓度
中秋

子昂幽蘭脩竹

舊時長見揮豪處脩竹幽蘭取次成欲把一竿蒼水上鷗波千里看
雲生

子昂竹石

數尺琅玕近玉階連昌宮苑少人來
庚庚蒼石如人立恐有題名上紫苔

畫竹石

井中墮却翡翠釵海上拾得珊瑚鉤
蒼龍過雨影在壁斷雲零落令人愁

箕簷谷中春事晚老鶴俛啄莓苔生
長鳴戛戛雨氣潤舞羽脩脩山月明

酬書巢送棕箒

積雨蒼苔路不分松華盡日落紛紛
塵埃滿袖歸來晚誰與柴門掃白雲

子昂畫

棠梨枝上白頭翁墨色如新最惱公
直似故園花石外銅盤和露寫東風

送上黨長

春雨人籬長紫苗縣庭無事坐終朝
俯看雲氣千山表野有新田市有謠

畫馬

蕭條沙苑貳師還
首宿秋風盡日閒
白髮圉人曾習御
長鳴知是憶關山

號國夫人學畫眉
宮門催入許先馳
春風十里聞薌澤
新賜金鞍不受騎

畫羅漢

虎嘯千山木葉空
晴空無處著神通
蒼龍浴罷軍持水
閒玩明珠似日紅

題納涼圖

百頃芙蓉水滿隄
綺牕只在畫橋西
羊車薄莫過湖曲
驚起鴛鴦不並棲

題畫

松戴蓬萊山上雪
竹含滄海岸邊風
三更月上誰能看
唯有河東學劍翁

題趙子固山礬瑞香水仙菡萏

梁園池館日蒼涼
飛蓋追隨憶故鄉
澤畔行吟春事晚
時時駐屐近微香

息齋竹

紫貂蚤解獵圍驂一棹夷猶雪滿簪山雨欲來春樹暗盡將情思寫江南

冬至前一日會吳宗師

繇繇微息起黃庭仰望扶桑拂帝青海上鶴來知有意手持楊許寫來經

題吳彩鸞所書唐韻

豫章城頭寫韻軒繡簾窄地月娟娟尋常鶴唳霜如水書到人間第幾篇

壬申芝亭宜春帖

祇今江上無茅屋何日成都有薄田若荷聖恩歸去蚤東風擊壤慶堯年

髮從更白三千丈身似初生第一春久向黃庭留白鶴偶隨華蓋駕蒼麟

東風吹雪著髭鬚目力都妨讀舊書兒子總堪供稼穡故人還許共樵漁

一種芝蘭異楚薪儀如鸞鳳氣如春他山借石成瑚璉莫負深耕種

玉人

華萼樓宴集圖

華萼樓前翠輦來寧王吹笛百花開夾城誰敢爭馳道獨對霓裳進玉盃

爲歐陽學士題子昂墨竹

蒼崖倚木雲千尺新筍穿林玉一雙若到瀟湘聽夜雨定知翦燭向西牕

先生歸到歸鴻閣閣下應生此竹枝定有鳳凰來共宿可怜翡翠立多時

送道士趙虛一歸金陵

三月二十五日集侍立延閣

上顧問集嘗至金陵否集謹對

曰嘗到又曰冶亭是朕所題往年八九至其處新松當長茂矣集謹對曰臣猶是未種松時到也近臣奏曰玄妙住持道士趙虛一所種也上曰然又顧集曰已陞觀爲宮汝知之乎集謹

對曰臣奉

勅題榜賜之矣是日趙虛一來別歸江南卽告以

聖上不忘冶亭之意又三日吳大宗師賦詩贈行董先生爲持卷來索賦因錄所得聖語如上云

春明畫侍奎章閣 聖上從容問治亭爲報仙都趙貞士新松好護
萬年青

題子昂春江聽雨圖

原序

越鳥巢南枝所欲得於江湖之上者甚不多也區區不余畀觀
此慨然

憶昔江湖聽雨眠翩翩歸鴈度春前數株古木依茅舍老去何年踏
釣船

賦思州田氏楊夫人柏舟堂

白髮高堂晝霧昏自將忠義教兒孫邊傍種得千株柏雨露深深荷
主恩

次韻杜德常典籤秋日西山有感

落日龍舟山下回寺門依舊對山開霜凋碧樹烟生草從此頻傷八
月來

百頃夫容野水光石梁秋日度流香空遺玉座臨高閣只有金仙住
上方

閣上露華生翡翠潭陰日色射金虬舊時車駕迎風動此日闌干傍
水流

每進文章出殿遲日華西轉萬年枝甘泉罷幸楊雄老滿鬢秋風不受吹

題畫柯敬仲雜畫

夢裏江南憶舊游明璫翠珮不勝愁一鉤纖月清如水吹笛何人共綵舟

黃荃夫容乳狗

西旅初聞效貢來金毛覆地不凡材騶虞麟趾同靈囿抱子花陰臥石苔

題柯敬仲畫

牽牛引蔓上棠梨上有幽禽夜夜栖自有秋風動疎竹江南落月不須啼

題蔡端明蘇東坡墨蹟後

原序

天際烏雲含雨重樓前紅日照山明嵩陽道士今何在青眼看人萬里情此蔡君謨夢中詩也僕在錢塘一日謁陳述古邀余飲堂前小閣中壁上小書一絕君謨真跡也綽約新嬌生眼底侵尋舊事上眉尖問君別後愁多少得似春潮夜夜添又有人

和云長垂玉筍殘妝臉肯爲金釵露指尖萬斛閒愁何日盡一

分真態爲誰添二詩皆可觀後詩不知誰作也杭州營籍周韶
多蓄奇茗嘗與君謨鬪勝韶又和作詩子容過杭述古飲之韶
泣求落籍子容曰可作一絕韶援筆立成曰隴上巢空歲月驚
忍看回首自梳翎開籠若放雪衣女長念觀音般若經韶時有
服衣白一坐嗟嘆遂落籍同輩皆有詩送之二人最善胡楚云
淡妝輕素鶴翎紅移入朱闌便不同應笑西園舊桃李強勻顏
色待春風龍靚云桃花流水本無塵一落人間幾度春解佩暫
酬交甫意濯纓還見武陵人固知杭人多慧也

祇今誰是錢塘守頗解湖中宿畫船曉起鬪茶龍井上花開陌上載

嬋娟

白樂天蔡君謨陳述古蘇子瞻皆杭守也

老却眉山長帽翁茶烟輕颺鬢絲風錦囊舊賜龍團在誰爲分泉落
月中

三生石上舊精魂解后相逢莫重論縱有繡囊留別恨已無明鏡著
啼痕

能言學得妙蓮華贏得春風對客誇乞食衲衣渾未老爲題靈塔向
金沙

丹丘柯敬仲多蓄魏晉法書至宋人書殆百十函隨以